



PUJOL ANÓNCIE AUMENTS ENES PENSIONS MÈS BAISHES ENTÀ COMPENSAR ERA INFLACION E PREPAUSE REVISAR ETH PACTE DE TOLEDO

Eth Govern catalan se desmèrque deth sistèma aplicat per Chaves en Andalusia

Eth president dera Generalitat anoncièc ager, en declaracions a Europa Press, que i aurà un acreishement des pensions mès baishes des pensionistes catalans entà compensà-les des pèrtes acumulades pr'amor dera inflacion en cinc ans. Parallèlament, prepausa que se revise eth Pacte de Toledo. En aquesta revisió, CiU prepausarà er augment des pensions mès baishes, tant des contributius com des non-contributius.

Pujol viatgèc tath sòn burèu oficiau des de Queralbs, a on auie començat es sues vacances. En èster demanat per açò, afirmèc que "lèu non se pòt parlar d'interrupcion des vacances perque tot just les co-

mençaua, e ath delà tamb un acte entremieï en Ripòlh entath lançament deth programa Camió.Net de difusion d'Internet en 41ciutats de Catalonha". Eth president catalan, totun, expliquèc qu'auie tornat tath sòn burèu "non perque i age cap d'ahèr urgent ath quau è agut d'anar, senon que demorauen quate o cinc tèmes entà deishar prèsti. Eth mès important ère eth de discutir tamb eth conselhèr Farreres un estudi dera conselheria sus es pensions".

Revisar eth Pacte de Toledo

Eth president dera Generalitat manifestèc que "cau procedir ara revisió deth Pacte e li cau dedicar ua atencion preferenta". Pujol senhalèc qu'er enfocament dera revisió s'aurà de delimitar en moment en quau comencen es negociacions, mès "en principi defensam un increment mès

naut des pensions baishes, contributives e non-contributives, maugrat qu'ei vertat qu'aguestes darrères acostumen d'èster mès baishes. Ei a díder, un increment superior ar IPC entàs pensions mès baishes. Que cau auer en compde que deth totau de 7.400.000 de pensionistes que i a en Espanha, lèu 1.800.000 cruben mens de 45.000 pessetes ath mes".

Crítèri diferent deth dera Junta d'Andalusia

Quan se li demanèc se se prepausae seguir un sistèma parier ar aplicat pera Junta d'Andalusia, Pujol responec que "non". "Non podem pas guidà-mos pes crítèris dera Junta -higec-. Eth nòste problèma qu'ei diferent. Per tant, haram ua auta causa, mès cossent tamb era realitat catalana e es besonhs des pensionistes catalans. Preneram ua mesura

mès específicament catalana, de moment aplicada as pensions non-contributives, as assistenciaus e as dera LISMI, qu'acostumen d'èster mès baishes".

Pujol higec que "des quate ans que van de 1995 a 1998 sonque en un era inflacion catalana siguec igual ara espanhòla, er an 1995. Es auti siguec mès nauta. Com que ja auem nomenat qu'er Estat deth benestar en Catalonha a d'èster eth 'nòste' Estat deth benestar, auem de procurar que hèts com aguesti non damnatgen as nòsti ciutadans. Per tant, eth Govern catalan dues causes que harà: defensar es pensions en generau ena pròplèu revisió deth Pacte de Toledo e compensar era pèrta de poder aquesitiu des pensionistes catalans non-contributius pr'amor dera màger inflacion catalana de 1995 a 1999".

PIMENTEL CONSIDÈRE ES AUMENTS DES PENSIONS "UN ATEMPTAT CONTRA ES REGIONS MÈS PRAUBES"

Eth ministre de Trabalh, Manuel Pimentel, assegurèc ager en Fregenal de la Sierra (Badajoz) qu'era pujada unilateral des pensions que se vò amiar a tèrme en Andalusia, Catalonha e Balears ei "un atemptat contra es regions mès praubes", e hec ua crida ath president der executiu extremen, Juan Carlos Rodríguez Ibarra, entà "que non se some ad aquesta corsa". En aguest sentit, remerquèc qu'eth sòn Govern assegure es pensions jos uns crítèris d'igualtat, solidesa e seguretat deth sistèma. Per açò aperèc ath "sentit comun" e ath "sen" d'Ibarra, ath quau demanèc que "hèsque bon çò que tanti viatges a dit... qu'auem d'auer mercat en tota Espanha e non marginar ne damnatjar es zònes praubes". Li demanèc que mantingue ua actitud d'igualtat e unitat entà toti es pensionistes d'Espanha.

Atau madeish, Pimentel avertic qu'eth Govern emplegarà toti es mieis legaus ara man, includith eth recors deuant deth Tribunau Constitucionau (TC), entà esvitar que se cope era igualtat d'oportunitat e qu'es pensions acaben siguent objècte de "batèsta de petiti satrapes locals a on cada vilatge volgue auer pensions diferents ath deth costat". En quinsevolh cas, se mostrèc confiat en qu'eth TC darà era rason ath Govern en recors plantejat contra era Junta d'Andalusia.

ASTÚRIES SE SOME A CATALONHA, ANDALOSIA E BALEARS ENA PUJADA DES PENSIONS

Parièrament qu'en Andalusia, Balears e, nauèrament, Catalonha, eth president deth Principat d'Astúries, Vicente Álvarez Areces, tanben vò mielhorar es condicions des que mens an per mieï des pensions non-contributives, sonque s'eth Govern non les apuge pendent er an que ven. Eth socialista Álvarez Areces remerquèc qu'eth sòn Govern vò qu'er executiu estatu apuge es pensions, perque "ei eth qu'a capacitat entà hèc", entà qu'es recorsi generadi pera situacion economica favorable repercutissen enes mès desfavoridi. "Se vedem qu'eth pròplèu an eth Govern dera nacion non hè arren ath respècte, auriem de sajar de mielhorar era situacion des que mens an e passen mès dificultats", higec. Eth president deth Principat soslinhèc qu'era actuacion deth sòn executiu s'aurie de limitar as pensions non-contributives, es quaus, segontes eth Tribunau Constitucionau, entren laguens des competències des comunitats autonòmes. "Arrés non vò trincar era caisha unica", assegurèc.

AGER SIGUEC ENTERRAT ANTONI GRAU

Eth funerau peth director deth Patronat Economic de Lhèida amassèc a 500 persones

Ues 500 persones, entre es quaus i auie er alcalde de Lhèida, Antoni Siurana, assistiren ager as funeraus entar economista e director deth Patronat de Promocion Economica dera Deputacion de Lhèida, Antoni Grau Morell, que moric delàger as 69 ans victima d'un accident de transit.

Grau auie dirigit diuèrses empreses deth sector privat, com San Miguel, abantes d'entestar eth Patronat, que prebotge iniciatives laboraus des dera corporacion provinciau. Pendent es funeraus, que se hèren ena parròquia de Sant Laurènç de Lhèida, eth sacer-

dòt oficiant remerquèc es valors umans e cristians de Grau, e soslinhèc que tamb era mòrt d'aguest se barre un periòde dera transformacion economica dera província. En aguest sentit, eth president dera Cramba de Comèrc e Indústria, Joan Simó, didec qu'era sua mòrt "serà ua gran pèrta entàs comarques de Lhèida" e remerquèc eth sòn trabalh en diuèrsi fronts economics, com era empresa San Miguel. Eth vicepresident dera Deputacion, Miquel Padilla e eth vicepresident segon, Francesc Xavier Ballabriga, senhalèren que Grau possèc eth plan de promocion empresariau e

ocupacionau de Lhèida. Er accident de transit en quau moric Grau siguec tath torn des 20.30 ores deth ser de dijaus, ena gasolinèra de Sant Miquel de Juneda (Es Garrigues), ena carretèra N-240, quan era mòto Yamaha tamb matricula T-9842-AJ truquèc contra eth torisme Ford Mondeo, matricula L-3248-Z que condusie Antoni Grau, eth quau moric pòc temps dempús. Eth conductor dera mòto, José Àngel V. P., de 37 ans e vesin d'Ilche (Òsca), tanben moric tot just dempús d'ingressar en espitau Arnau de Vilanova de Lhèida.

COMENCEN ES JORNADES ENTÀ REBREMBAR ETH PASSAT CATAR DES COMARQUES CATALANES

Era quatau edicion des Jornades dels Refugis Càtars al Pirineu catalan a coma objectiu principau rebrembar eth passat catar des comarques catalanes dera Cerdanha, Berguedan e Naut Urgel, expliquèc era portavotz dera organizacion, Montse Subirana. Aguestes tres comarques, pes quaus trancor eth nomenat Camí dels Bons Homes, sigueren, ath delà de tèrra d'acuelhuda des catars que hugien dera repressio en Occitània, tèrra de conversion de quauqu'uns des sòns nòbles e cavallèrs, com Arnau de Saga, Bernat de Bretós, Guillem de Berguedà, Ra-

mon de Josa e Arnau de Castellbó. Eth programa des jornades, que per prumèr còp s'amplie tara Cerdanha e eth Berguedan, s'encetèc delàger en Belhèr de Cerdanha tamb ua conferéncia deth politic e escrivan Antoni Dalmau sus es catars. Entà ager ère programada era tradicionau caminada populara entre Belhèr e Bagà, en tot seguir eth Camí dels Bons Homes, en un trajècte que dure de cinc a sies ores. Era inscripcion entad aquesta excursion, limitada en principi a 25 persones, s'aguc d'ampliar a 30 pr'amor dera grana

(Contunhe darrèr)

